



盱江新城縣志



江西新城縣志卷之二



三韓周天德秉彛纂修

北田涂景祚萬年編次

建置志

有封域則不能無建置故城郭溝池所以爲固也穹堂
廠坐所以爲治也及諸書契之所積帑藏之所安寢處
之所適自長倅至于胥史咸必得其所監司所駐樂行
部之尊賓從所經遂如歸之願與夫廣積貯以備凶災
設津梁以通內外皆治一邑者之不可有缺也新城開

邑且四百年始有城厥後地修不一今則如崇如墉矣
自宋令趙公輔首創縣宇歷代更變毀建靡常今仍有
巖有翼矣其諸行署倉廩郵亭舖舍橋梁津渡昔置今
廢著載紀冊者皆班班可考以知安常習故忘廢遠猷
者之非識治體也孰謂建置之可廢乎第說以使之無
至於勞民傷財則善矣若夫元宮梵宇雖無關政治然
前朝賜額名士詠賦往往而在况

國家圖籍已列編氓賦役所稽前志脩載茲附列于篇述
建置志

城池

宋

元

邑雖以新城名實未有城

明

正德七年壬申知縣徐繡以鄰封多警奏行建城始
築土垣周九百三十八丈高八尺暫覆以茅工未畢
以憂去

八年癸酉知縣黃文鸞繼其事增高二尺内外甃以

石厚十尺廣十五尺女牆一千八百五十有奇鋪三十六門四望閩通濟昌文朝宗門之上覆以樓各四楹踰二年乃訖工

東西南三樓官建北門樓義民潘用寬建○都御史林俊記畧云

新城屬建武本南城黎川舊鎮界聯閩粵嶺嶠之間萑苻弗靖居人苦之宋紹興間始析爲縣叢山孤寄而地常夜驚自逆瑾搜括民財公私並困民窮而盜起若撫之長林饒之姚源瑞之華林汀之大帽與荆粵之寇番涎建武者無虛日新民惴惴乎危之僉曰城守便於是安君奎令徐侯繡爰始爰謀毅然剏興

築土而城高僅八尺上覆以草徐憂去黃侯文鸞來令歎曰新雖山僻實招武之咽喉建武之肩背苟非有如崇如墉者以固吾圉焉安在進可戰而退可守爲江省上游屏蔽哉侯乃集紳士議議定遂請之各上臺具報可諏日鳩工百堵並作舉徐君所築而式擴之城厚一丈高加以尺者六內外甃以石垣而甃者半週千丈餘堞者千八百五十有奇鋪者三十六門者四覆以樓東曰望閩西曰通濟南曰昌文北曰朝宗時則有憲副楊君璋憲僉王君疇申令責成侯

監督而勸懲之不踰年大工告竣金湯屹峙邑人式歌且舞曰吾儕得有茲保障者皆黃侯之賜也夫設險所以守國武牢營而鄭人懼東陽城而萊子服古今情勢大略相同爲民牧者庸可惜勞費而不爲經久計耶雖然既勞思節之既費思復之雪寃宣滯謹視其樂苦推心而置腹者無乎不至亦如城然祇見其恃而不見其厲則民安於令亦如安於城將見衆志成城又不獨特我侯爲長城也矣予故因工部李君泰知府何君壘之請而樂爲之記○
又吏部主事夏良勝有序

今不錄

城成之五年己卯夏大水西南二方圯歲久不修東北二方亦圯其半

嘉靖十四年知縣殷學夔脩昌文門

三十六年知縣李伯生因閩寇犯南豐備申撫按司道脩築環城仍舊式爲舖三十六重建西門城樓增豎東城敵樓城完閩寇猝至賴城以守士民因爲立勒功亭○
祭酒王材記云新城名邑數百年然未有城正德壬申始議城越五載城成己卯圯於水圯四十載茲

始克脩城乃再成甫成而閩寇至城之民適賴城以全於是知城之爲利而邑令李君脩城之爲功邑諸紳士父老咸願紀李君之蹟鑄諸石以永念弗忘初李令之議脩城也羣言轆轤十不一然當道亦持其議不下歲餘閩寇薄南豐令糾民揚兵爲備奮然曰警已及鄰如惑衆言是泄泄以待蹶也今必修城衆猶依違令任其怨弗撓當道亦報可乃簿民產力平其役俾之自營旦夕躬閱之亟戒其成戊午春三月肇工又七月畢工僅浹月泰寧報有寇殺其主簿欲

至新城邑吏民弗爲意也九月戊寅寇旦抵城下有鼓刀於南門者望見之急與其子閉城門控以屠杙寇見門閉轉而掠城南焚百餘室明日復至攻城城上人以虎箭射卻之趨東門投以火燔城下屋不得進又明日寇驅所擄男婦數十口退二十里爲營責其贖令有事試闢自會城歸道聞寇兼程夜入邑撫安百姓晝逐寇寇聞令歸當道檄諸援兵亦且至乃復退十餘里保山寺中令遣兵追之寇殊死鬪殺數十人寇亦前卻失勢乃縱所驅婦女遁歸於閩寇既

退士民皆涕泣誦李君功謂非李君城不克脩非城則寇至不克禦今日父母妻子室廬貨器得保以生全者李君之賜也使李君苟於避怨諉後患於未期則猝至之寇不警之民蕩然罔可爲恃焚掠所嬰豈止百室數十人而已也李君之功誠世世不能忘者抑聞寇始至時黃霧覆城寇不能仰視莫知未備豈此方之人質厚無惡神明實護持之則城之久圯而頓脩李君之強民以必修卒捍大患又若有所以使之者夫曠擬者難率而繼成則易集無徵者弗嚮而有戒則勸功後之令宰時而葺之力輕於因民悅其恃豈非斯邑無窮之幸哉

三十九年知縣湯建衡重脩環城覆以屋增築四門

月城○自記天下事創於前者莫難於任怨繼於後

畧云

者多廢於因循二者恒相湏而未能交相贊以有成也觀於斯邑城垣廢興脩墜之故可以末慨矣邑故無城按舊志正德間因廣寇破建寧入南豐前令黃君始創爲城已卯圯於水繼之者玩於承平咸無復修之志日就頽廢嘉靖三十六年廣寇復來犯南豐

遠近響震存齋李君適自餘姚改調至廼遣衆建議
申請築城葺年僅訖工而流寇已叩東南門矣已未
春存齋君復改調去而余以是年冬來涖茲邑既而
春雨瀰月城週九百五十丈有奇而倒塌者六百五
十餘丈葢緣初築時急於速成一切粗率苟完故耳
余晝夜督工脩築而寇報沓至秋七月修復方完閩
中警息洶洶八月初旬寇入秦寧焚掠遂犯德勝關
而王守備死焉此庚申歲事也自是廣賊前後四薄
縣境三至城下竭力捍禦數年間未嘗一日解嚴城

初無月城賊至即攻門余復於戰守餘措築各門月
城由是兵民效命始皆爲完守計矣

云云

崇禎十一年戊寅邑南冢宰涂國鼎重拓環城週九
百三十八丈高二丈一尺厚一丈二尺內外甃以石
上墁以磚女牆一千九百八十舖二十有四各城樓
敵樓月門俱仍舊惟東門改額迎福肇工於是年之
秋落成於庚辰八月○
公仲子斯
皇記畧云吾黎居建武上游
三面界閩蓋江右僻壤也城初於正德壬申重脩於
嘉靖戊午然低薄弗堪久之而堞樓傾圯者甚矣先

是妖寇竊發震及鄰封楊令君同先公登城巡警相
顧歎曰是可踰而越也迨崇禎戊寅詔天下郡邑脩
練儲備先公於是集紳士里老謀增繕之舉因合詞
請之邑長吏上之兩臺監司俱報可檄詢經費所由
出維時功令四款列量派地畝之條再察嘉靖重脩
有隨糧均派之例先公於是復集紳士里老謀曰上
田均派損富無損貧也增埤浚隍衛民適自衛也諸
君之志若何衆皆唯唯仍合詞請之邑長吏長吏上
之兩臺監司俱報可乃始鳩工庀匠伐材鑿石壕塹

並舉版築如雲雖然是匪直脩也而實造議增高厚
壯藩垣也議建敵臺備守望也幅幘計千餘丈估價
且數萬金以言均派計實徵銀二萬七千二百七十
有奇矣以言義助先公首捐一千兩邑紳富共捐二
千六百餘兩前後三邑侯捐俸共五百六十餘兩矣
以言搜括動支南糧改折解費一千二百五十餘兩
矣猶且一簣功虧九仞力絀先公毅然曰吾作之吾
成之吾始之吾終之不以累後人也於是復發稟中
金計三千八百四十兩有奇以佐不給乃克畢勉竣

厥事事既竣先公借諸耆督四顧曰美哉城是何異
吳之鐵甕蜀之錦城蕪之新岸長雲也瞻彼東關非
黎城地脉所自乎高岡崇阜豐碑斷碣何限亦有靈
峴山之淚焉否也南望簫曲覆船如在天半蓋仙靈
棲隱之所已有名山其足爲斯城增重歟西則日岫
馬鞍諸峯或坐或立或跪或起若環拱斯城而爲邑
外護也北顧龍湖石硤若重關然車騎冠蓋闐闐不
絕夫固黎城之孔道乎嗚呼由今觀城闕鬼幾樓閣
森聳金湯屹峙冠於羸邑孰知始事之維艱而告成

皇清

之匪易也如此

按經始落成年月日及輸財督
工諸姓名紀畧脩載茲不具錄

順治十六年己亥知縣卜慶熊脩之

康熙三年甲辰知縣操弘儒改脩城堞合三堞併爲

一堞

是年奉部文令天下府州縣城各改併八字堞
口新城舊堞一千九百八十八今併止四百九十

有五

康熙六年丁未四月水西城外石墻崩圯二十五丈

知縣周天德補葺之

公署

縣治

宋紹興八年戊午置新城縣治事於黎灘鎮明年攝
知縣事南城縣丞趙公輔劾建縣宇○

陳孔休
記畧云建昌

居江西上游本撫州南城縣治所僞唐升爲建武軍
皇宋太平興國二年始賜今額治南城南豐二大縣
綿地數千里戶主客餘四十萬東控引閩粵南當汀
虔要道其山麻姑其浸盱水地靈川秀故士君子敏
而好學文而有禮其細民則未免健訟喜爭租賦不
時盜賊繼作有閩贛之風前此令於兩邑者質明視

事夜分乃罷尚或不給繼以病去豈特細民之罪叅
稽成周之制大國一圻小國一同漢法萬戶以上爲
令不滿萬戶爲長蓋不期然聞之父老自崇寧迨宣
和罷請部使者論列於朝用唐武德故事分地建邑
屢寢不報上即位十有三載知軍事汪公待舉毅然
條析利害益詳於是安撫使臣李綱轉運使臣逢汝
霖合奏曰臣等叨奉睿旨安撫一路伏覩本路建昌
軍南城南豐兩縣繁劇爲最非各添一縣則難以督
租賦息盜賊上許之命有司分南城縣上五鄉就黎

灘鎮建新城縣制下郡選右從事卽南城縣丞趙公
輔攝令事公初至寓治僧舍未忍以興建勞民越明
年正月父老私相歎曰吾儕小人且有闔廬以庇風
雨今吾屬父母暴露匱薄我則非人相與竭蹶趨事
伐材運陶絡繹交獻未幾而堂寢門廡犴府庫與
夫羣吏之舍燕處之室無不畢備五鄉之人以事至
者望其門卽其庭仰瞻堂階之崇峻肅然愈加畏伏
不敢爲非義孔休以進士與被鄉舉將待試禮闈公
命爲記因爲述其本末使有考焉

紹興中燬於寇

嘉熙中知縣事趙瀛夫復建

元末復燬惟存後堂

明洪武二年己酉知縣沙良佐展民地築墻重建中
爲正廳東爲庫西爲架閣庫東北爲幕廳前爲露臺
中爲甬道立戒石亭東西兩序爲六房糧科承發科
前爲儀門五間西一間爲土地祠門內西爲監房前
爲大門上立重屋爲譙樓縣廨在後堂之後前有濯

纓池

宋知縣趙觀鑿引荆源水注之四時清
澈因作亭其上題曰濯纓亭後燬於寇左爲縣

丞廨右爲主簿廨儀門之左爲典史廨六房之後爲吏廨

二十三年庚午譙樓圯明年辛未再建

宣德二年丁未知縣馮時重修

邑朱徽
記畧云

古制郡有

譙門縣則式而少損之置建鼓以警晨昏設刻漏以定晷度其來尚矣新城縣郭登籍萬家治衙居中簾曲日峯東巖石硤四面環向門建大樓以相表襮自宋迄今不易其制洪武庚午樓仆於地明年辛未尋復建置歷年既久風雨震凌又幾頽毀永樂壬寅冬

仁和馮侯時來宰茲邑甲辰秋浦城吳侯敬榮寔來貳政首振綱紀可因否革三年之間政化大行聲績藹著今年七月馮侯秩滿將戒行李上趨京師以膺課最乃以縣樓之宜脩告諸同寅詢諸耆老無不樂從揆日度材費取經常會未淹時復覩巨麗黜聖丹碧煥然聳壯城郭山川一目具在過其下者鞠躬屏營知有官府之尊嚴縣制之整肅斯足以見高明經遠之規豈務爲壯觀已也自洪武辛未重構以來距今三十七年始加脩治宜記巔末以傳永久

云云

正統元年丙辰知縣陳員韜重建正廳脩後堂作穿堂以聯之

成化九年癸巳知縣呂讚重脩正廳未豐狀元羅倫爲之記

弘治二年巳酉譙樓燬甲寅知縣段敏重建○廣昌刑部

尚書何喬新記云新城爲縣自宋南渡始析南城之半爲之

立縣治所於黎川始爲縣者建譙樓於縣治之前上置鼓漏以辨昕昏下設閔闔以嚴啓閉由宋至元由元至明四百年樓之廢且興屢矣弘治三年秋畢方煽毒穹簷傑棟化爲煙燼樓燬之二年金壇段侯敏

由進士來宰是邑察政之疵民之病梳剔而摩撫之凡有所爲本之以廉行之以仁民既感悅顧譙樓久廢無以昭等威竦觀聽乃圖興作謀諸寮佐僉以爲宜時叅議李公文魁以公事涖縣侯其白之公公曰縣有譙樓禮法所宜檄下從之侯方會計帑藏羨財以爲構築之需民間之相與語曰吾侯廉非便其私圖者又曰吾侯仁非時屈舉羸而妨我穡事者歡然欣助無或有後侯乃鳩工令徒相方視址卜日而興事焉以畚以築以剏以削經始於六年冬十二月訖

工於明年夏六月爲重屋五間其崇二丈五尺八寸
廣一丈六尺深一丈二尺侯合賓屬士民登而落之
曰溪山之勝近在目前棟宇之麗輝映霄漢境內士
民來遊觀者咸以爲前此未有也於是邑之耆舊與
里居之賢以爲侯作麗譙民不勞而事集不可無文
以垂永久乃因子族孫屋求紀成績予惟譙樓之作
鼓漏藏焉日之所昏於是乎辨官之作息於是乎節
民之觀聽於是乎齊其所關重矣昔者周之諸侯興
居無節來詩人之刺宋之邑長更漏分明膺名臣之

薦侯之此役豈尋常興築之比耶

是役也經營皆侯主之贊成則縣丞

黎瑄主簿祝達典史顏彪與董役鄉老執程縣掾暨助財官力諸人各具列碑陰

正德八年癸酉知縣黃文鸞重脩正廳

邑李泰爲之記

嘉靖四十一年壬戌知縣湯建衡於廨東濯纓池上

建一鑑堂三間○

自記云

邑志載衙之東舊有濯纓亭

嘉靖己未余初至訪求其遺跡但廢址荒荆汚池聚
蛙而已爾時欲脩復舊規而頰遭寇警飭武備時軍
餉日且不給奚暇謀此哉迨歲庚申冬會奏夾勦命
下寇皆斂跡歸巢始得息肩乃以俸餘易木石築堤

岸卽舊址臨池構屋三楹後闢一軒落成之餘公暇
坐堂中俯視池水淵瑩澄澈清深潄蓄目况神怡蕭
然有江湖之思風雨時至則簷溜瀑注濺玉跳珠當
晴月則浮光淨影輝映上下向之荒廢蕪陋者增勝
而改觀矣故以一鑑名堂而扁其軒曰省愆仍存濯
纓之額於外者竊欲省過以鑑得失庶幾漸復濯纓
之樂云耳昔王元之謫黃州作竹樓記末以竹樓之
不朽望之後人今余記是堂也豈敢比美前人第望
後不朽之計則固與竹樓之作異事而同情也於是

爲記

萬曆元年知縣蒲德裕復脩縣堂正廳及譙樓後廡
四十八年知縣殷聘尹重建縣正堂後堂譙樓廡舍
崇禎六年知縣楊榮修之於露臺植槐六株

皇清

順治二年乙酉縣治燬於寇縣丞主簿典史各廡盡
燬惟存儀門譙樓

康熙二年癸卯知縣操弘儒建縣正堂東西二庫後
廡儀門惟後堂及正堂東西兩序工未畢而卒

自縣治燬

後蒞事者相繼以按察司行署爲治所未有議創建者獨操侯竭力爲之

七年戊申知縣周天德修譙樓建東西六房糧科承

發科○

邑進士涂景祚記云

縣有麗譙蓋準周官挈壺氏之法

而作於治之大門上置鼓漏以辨所昏下設閤闥以峻閑衛俾民知嚴警而罔逾於防匪徒取諸萃麗譙甍以飾觀覽已也新城麗譙之建而圯圯而復建者屢矣

明華初縣宇燬於寇獨譙樓尚遺一綫於煨燼之餘歷今二十餘年蒞縣事者交寄治於按察司行署舊治

故址惟頽垣斷砌荒基敗礎周道茂草行人爲之咨歎無復有薙荆榛闢瓦礫踵而新之者前後更數政嘗欲有爲顧力有未遑卒因陋就簡

康熙元年壬寅前令操侯弘儒來宰茲邑拊摩鞠治民樂惠和二年癸卯顧覘城邑之壯麗民物之輻輳慨然欲新之謀諸父老僉以爲宜於是請於各臺得報可乃鳩工庀材首建正堂儀門繼擬後廡惟後堂六房譙樓工未畢而操令以疾卒於官歲丁未三韓周侯天德奉

命繼蒞斯土睹縣宇之閎壯憫譙樓之傾欹輒思欲繼成其事越明年政通民和年穀稔登侯於是樂歲物之豐成乃復謀諸父老選吉肇工伐材運陶榱桷之腐落者新之楹棟之摧折者易之先脩譙樓次建六房越三月而落成於是陳鼓角設漏刻以節四時以達遠近飛簷鸞翔修棟卧伏不陋不侈適與堂相稱使非侯之繼踵其美則雖有操侯經始於前亦安能克終厥成於後也哉然則侯之興是役也可謂善繼善成者矣樓旣成屬予記其事因爲書其本末以紀

之

十一年壬子知縣周天德復新廨前濯纓池關帝廟

○自記云廨舍之東有關帝祠即昔之濯纓亭也亭前

鑿方池引荆源之水注之四時清澈因作亭池上題曰濯纓蓋宋令趙君觀所建也明嘉靖壬戌湯君建衡脩復舊規額其堂曰一鑑軒曰省愆亭仍曰濯纓天啓辛酉殷君聘尹更葺而新之祀關帝像於堂中自辛酉迄今五十年於茲矣第思帝忠義節概昭日月而垂古今誠千古人倫之鑑向之建亭名濯纓者

取其水之清而可鑑耳予謂鑑於水曷若鑑於古鑑於古又曷若鑑於帝則今之對越駿奔朝夕仰止者伊惟帝鑑之是式焉耳此吾於亭不能無深幸也曩時代沿革堂宇煨燼獨池亭如故豈非神靈訶護默有以相之使然耶余自丁未來官茲土每公暇輒憇息於斯歲久亭傾意圖改作而力未逮越壬子仲秋乃得庀材鳩工擴而新之中設神像左右翼室前軒臨池三閱月而落成因額其堂曰忠義寶鑑蓋以鑑水之心爲鑑古之心安在不同其照澈千古也哉因

備述其意用鐫諸石亦望後不朽之意云耳

申明亭

在縣門西民有作奸犯科者書此亭

明洪武八年知縣駱載德建嘉靖二十七年知縣李伯生重修後廢

旌善亭

在縣門東民有孝子順孫義夫節婦書此亭

明洪武十二年知縣田嘉建嘉靖三十七年知縣李伯生重修後廢

屏墻

在縣治前

宋紹興十七年甲戌縣令趙觀建勅書樓於縣治前

樓屋上下四間

進士劉希旦有記見藝文

元末燬再建改名南樓復燬

明立宣化坊額下爲門以蔽之後又燬

嘉靖三十六年知縣李伯生改砌屏牆今仍之

同安巡檢司

在縣西六十里宏村路通福建泰寧建寧宋爲同安寨元末改爲司明洪武三年巡檢羅仲真重建嘉靖戊午守備王址議改於樟村都民楊昇捐地九畝建辛酉燬於寇萬曆間復建宏村今仍舊

極高巡檢司

宋志石陂寨在禮教鄉長義保境接七閩鹽盜之所出沒熙寧法行乃建捕盜使臣於此兵五十人十年鹽盜再起江西轉運提刑鈐轄司相與上言改爲巡檢增兵倍其舊紹興元年土兵叛盡燔其營舍遷縣北七里妙智寺七年遷長義溪西九年復遷溪東元至正末巡檢江賜錄遷二十九都極高嶺下改名極高巡檢司

明洪武三年巡檢周柳重建後遷二十九都水口仍

稱極高司後又常居六都德勝關明末改遷三十三都洵溪

皇清初燬於寇

陰陽學

明洪武十五年開設舊蒞事於城隍廟嘉靖三十六年知縣李伯生建於城隍廟後

醫學

舊惠民藥局在縣治之右明洪武二年開設醫學即以局爲之

僧會司

明洪武十五年開設在城東淨居寺今在東湖寺

道會司

明洪武十五年開設在城東鶴仙觀今仍之

行署

布政分司

在城隍廟東

明正統五年奉工部勘合建正堂五間穿堂一間後堂三間兩旁爲廂房正堂前爲東西廊各五間中爲甬道儀門外爲大門

嘉靖元年知縣蕭一中修

皇清順治十五年知縣卜夢熊重修

按察分司

在縣治南

宋為提刑分司

元為廉訪分司燬於兵

明洪武八年知縣駱載德建正堂五間穿堂一間後

堂三間兩旁為廂房前為東西廊中為甬道為儀門

五間外為大門左右為官屬承候之所

嘉靖元年知縣蕭一中拓地重建

規制視布政分司為宏偉

皇清順治八年知縣楊成德脩十一年知縣范惟粹脩十

八年知縣焦鵬脩

未建縣治時蒞事皆相繼於此

康熙十一年知縣周天德重修

府館

在城隍廟西

明正統年建

皇清康熙二年知縣操弘儒脩

迎恩亭

為迎接使臣停止之處

宋建於縣北楊溪道左

在石硤嶺外距縣五里

元至正二年縣尹侯敬改建於北門外

距縣二里○謝升孫有記

明初復改建楊溪舊址嘉靖中圯隆慶六年知縣李
嘉猷仍改建於北門外崇禎末燬於兵

皇清康熙六年知縣周天德重建

厚脉亭

在東門外
金斗岡

明嘉靖三十六年知縣李伯生建

以縣治地脉由此
禁民取土閩中官

客往來亦以為迎
送之所後久廢

五福公館

在縣東北二十五
里舊為義亭舖

明成化九年知縣呂讚以義亭舖舊址改建公館為

江閩上司公使駐劄之所

翰林侍講南昌張元頌有
記○邑司成王材致書勸

貳守言驛遞夫事
載舊志今不錄

龍安公館

在縣西四十
里龍安鎮

礮石公館

明知縣殷聘尹建地屬南城公館係本縣所建故附

八

府公館

一在府城門頭嶺明知縣李伯生建知縣殷聘尹重
脩一在府城北街今知縣周天德同里民衆建以館
係屬新城故附八

倉廩

大有倉

在廣照寺前即宋都倉常平倉也

宋紹興九年知縣趙公輔建元末毀於寇明洪武元年改建大有倉知縣沙良佐修後廢

預備倉

明洪武間命郡縣各量道路遠近設立四倉豐年儲穀以備凶荒新城倉凡五所中倉在城東坊東倉在四十都西倉在五十三都南倉在三都北倉在八都

便民倉

在北門外三里灌湖園

明正德五年知縣徐繡奉例建於便河處所收兌淮南糧米九年知縣黃文鸞修萬曆三十一年知縣趙

日崇復修

皇清順治十五年知縣范惟粹脩

義倉

明成化丁未四十七都義民楊振邦發粟三百石儲之於社待鄉民艱食而廩之散無妄與歛無過取子嵩復益以三百石歲歉里民賴焉知縣段敏為旌其美訓導陳良心書其事○四十九都義民程正宗積

義穀一千石以賑鄉人

嘉靖戊寅坊民璩祐建義倉於二十一都黎家排貯穀一千石以貸民又捐倉前田十八畝以給守者黃儀

爲之○五十一都楊昇亦建義倉於本都

嘉靖丙申鄉官王祿建義倉於十三都○舉人鄧元錫積穀數千石貸諸農人邑南鄉數十里之農賴其濟遂無凶歲以上各義倉俱久廢無存錄之以無廢義行耳

養濟院

宋建居養院元建孤老院明洪武十三年建養濟院

在城內小北門田東卽宋元舊址中爲神祠左右各爲屋五間凡鰥寡孤獨廢疾不能自養者官爲存恤給以衣糧屋舍

皇清仍爲養濟院

康熙十年知縣周天德重脩

義塚

宋名漏澤園明洪武三年禁民間焚屍若貧無地者所在官司擇近城寬閒之地立爲義塚本邑義塚在縣治東門外舊教場山金斗窠凡死無歸者悉塋於

此今仍之

按澤及枯骨史氏所稱掩骼埋胔載於月令邑之
義塚以近城東邑內外居民取土其間豈惟無掩
瘞之仁且輒有暴露之患務宜禁止不惟得慰孤

魂兼亦以固地脉

又養濟院有官山義塚在胡家坑長排中有護塚松木

郵傳

總舖

在縣治門東○明正德志載舊有郵亭後有官廳廊房為司兵所寓亭亦久廢

白源舖

在縣九里北十一都

百順舖

在縣二都里北八都

禮義舖

在縣三十里北八都

九岡舖

在縣四十里北十都

自九岡以下五里為南城界

盧游舖

在縣東十里梔林

東興舖

在縣東二十里何家庄

白沙舖

在縣東三十里

洵溪舖

在縣東四十里

飛鳶舖

在縣東六十里

自飛鳶舖至杉關驛為福建界

義亭舖

焦源舖

今名長慶舖在縣西二十里十九都

龍安舖

在縣西三十里

弋陽舖

在縣西六十里

自弋陽舖至弋陽隘為南豐界

坊表

蘭魁坊

在縣治東為宋進士蕭雷龍立

登科坊

在縣治東為明舉人潘順立

世進士坊

在縣治東為進士涂欽涂敬涂順涂國鼎涂景祿立

世榮坊

在縣治東為贈郎中涂文政涂徵典署涂瑩涂億立

近御坊

在縣治東為鴻臚寺序班黃備立

豸繡坊

在縣治西為御史張檟立

清卿坊

在縣治西為太常寺卿王材立

進士坊

在縣治西為進士周備立

丹桂坊

在縣治南為舉人朱徽立

城隍廟坊

在縣治南左集福除災右佑善殄惡

五馬坊

在縣治南為知府涂憲立

進士坊

在縣治南為進士丁芹立

應奎坊 在縣治南為舉人李芳立

興賢育才坊 在儒學前東西本府推官譚述立

斯文重地坊 在儒學二門內

義路坊 在儒學二門教諭白玉奇立

科第聯登坊 在學宮泮池前為進士張櫟立

騰蛟起鳳坊 在昌文門內為選貢潘曾立

兩京光祿坊 在縣治南為贈光祿少卿馮希舉太宜人黃氏萬曆癸未進士光祿少卿馮渠立

進士坊 在南津為進士鄧義立

繡衣坊 在南津為御史鄧義立

臺憲流風坊 在縣南津為御史鄧義孫通判鄧桐立

應宿坊 在南津為知縣饒經立

繡衣坊 在縣治北為御史丁泰亨立

桂林世芳坊 在縣治北為何澄何瀆何燮何屋立

澎閣掌制坊 在縣北夏市街為翰林檢討掌誥勅王材立

世賢坊 在縣北為王益王灝王達王祿王材立

三世九列坊 在朝宗門內為贈太僕卿涂宏淑人鄧氏太僕卿涂朝敬太淑人江氏刑部左侍郎

涂國鼎淑人鄧氏立

百歲里坊 在縣治左明萬曆二十三年邑司空張公櫟為里民王家母李氏立

百歲重逢坊

在縣治北○明崇禎四年本府推官陳起龍為里民郭子烈母陳氏立

恩榮坊

在縣小北門內為太醫院使張復興立

司諫坊

在縣小北門外梅村為明給事中何澄立

狀元坊

在大北門外為宋狀元張淵微立明末燬於兵康熙十年改修石坊

世科坊

為舉人程新子進士程通立

登科坊

為舉人王祿立

世美坊

為舉人涂縉立○以上東坊

雲衢坊

為舉人鈕鑑立

登雲坊

為舉人聞禮立

賓賢坊

為舉人王灝立

進士坊

為進士李泰立

進士坊

為進士何壘立○以上西坊

攀桂坊

為舉人周冕立

繼美坊

為貢士嚴文軫舉人嚴績立○以上南坊

躍龍門坊

為舉人郭義立

大司成王公神道坊

在縣治北門外灌湖圍北田學舍前

尚義坊

在五十一都為義民楊本立立

尚義坊

在五十三都為義民孔彥旻立

以上諸坊存廢不一坊廢名存合併志之以記賢善

云爾

亭

敬一亭

在儒學
今廢

聖諭亭

在縣治
右久廢

厚脉亭

在金斗
岡久廢

蓋簪亭

在縣北二里○宋淳祐丁巳
知縣趙汝崖建久為水所决

風月亭

在縣南赤溪岸
宋李觀建久圯

照碧亭

在縣北二里仙
居山下今久廢

觀瀾亭

在北田
學舍前

垂綸亭

在北田
學舍前

醒心亭

在縣東七十里杉嶺
上亭下有泉久圯

省緣亭

在飛鳶嶺下相傳玄沙和尚修行
省緣之所人因為立亭今久圯

遺愛亭

在縣十三都楊溪孔道
士民為知縣陳員韜建

去思亭

與遺愛亭對峙士民
為明知縣蕭一中建

勤功亭

在龍湖山石硤嶺下士
民為明知縣李伯生建

日峰山亭

在日峯山嶺明知
縣趙日崇建久圯

白蓮亭

即今彌
陀寺

以上諸亭或供眺覽或關風水或係名賢遺跡雖存廢不一志之以示無忘云耳

橋梁

戴家橋

四十都何家庄石墩
所水二道里民建

洵口橋

三十三都洵溪大
路里人張廷用建

飛鳶橋

三十四都舊巡檢
司前木橋有屋

廣福橋

三十三都里民張思壽
募造石墩木梁有屋

昌文橋

又名小港橋
南門城下

平政橋

城南由西門出往南津路
宋嘉熙中縣令趙瀛夫建

菖蒲橋

木梁往
赤溪路

鯉潭橋

南三里宋為鯉潭渡明洪武初知
縣沙良佐建後圯里民募建木橋

石壁橋

南五里通水口熊村諸路明萬曆間邑庠李朝
東兄弟捐貲特建石墩有屋後舉人鄧韶修之

銅湖橋

鯉潭東岬東巖水所出義民周友員建石
梁後為水所决里民夏正爆改建木橋

水口橋

巡檢司前木橋
一小石橋一

白羊橋

妙法寺前里民江
碧清建石橋有屋

新豐橋

南津篁竹街兩涯之間舊為木橋明弘治中邑
人鄧楷許式劉奎朱萱許盛等捐貲建石墩木

梁有屋嘉靖中
寇燬後復建

石礫橋

在三都後
圯復建

石城橋 明三都民湯玄玉朱允恭僧明玉同建

大櫓橋 地名席家源

橫港橋 宋為孔家渡咸熙間水漲衝塞為陸後建此橋乃福山水合於黎處與新豐橋相望里民鄧楷

等重建

道人橋 二十三都明正德間知縣黃文鸞改題曰導仁橋

觀興橋 二都

七佛橋 福山下舊名慶來橋

磔波橋 二都

永興橋 在縣西二十一都舊有木橋萬曆丁巳大水衝决邑人涂大璘集衆建石墩石梁覆以屋已未

復修天啓元年重修

西山橋 在宏村明嘉靖中燬復建

樂土橋 在十都

高橋 在十都

惠德橋 在縣西門外舊名通濟橋

元延祐中縣尹王瑄建木梁石墩斫水五道

明正德丙子大水衝覆後為浮橋

萬曆八年侍郎張櫓重建石墩木梁改今額癸巳没

於水更新之丙午燬於火櫓長子應祥復脩之

四十六年丁巳夏大水復决邑涂朝敬糾里衆復建石墩木梁甃以平砥及東西兩亭○

子進士行人司行人國鼎記云

邑河西水滸當四坊逞來孔道故有惠德橋肇建於司空張公癸巳没洪水公爲更新丙午燬於火公厥嗣長君力脩葺之歲丁巳午夏陽侯作孽巨浸稽天衝决之禍視癸巳尤甚惠德泊安濟兩橋汨没於洪流逝波中蕩無存者自是褰裳涉爭渡濟淪胥溺者踵相屬闔邑皇皇然利涉重歌不知當在何日也前者創始諸君聚族而謀曰張公之惠德湮矣吾儕當

年首事之謂何顧弗克脩而復之其亦大有愧心雖然工綦鉅費綦繁而力綦艱誠得一碩望爲主盟用能孚衆心而勦重舉於是羣造家大人請焉曰此一邑之利而萬世之功也信後說先實嘉賴之家大人故有慨於中也會邑之行携僮負踵門歡呼請命者數百人家大人愀然曰當吾世而忍斯民之病涉也歟哉夫天根見雨畢則除道辰角見水涸則成梁王政也縱予老堪自愛然幸以子官徼恩綸之錫庶幾借此舉效庇民報國之微勞乎爲之捐貲首倡以募

邑中諸厚積貯者無弗躍起而嚮應也已又簡善力
具者數人董紀綱之役擇吉祀江鳩工礱石下直入
底裏柱以石砧中甃以平砥密無絲罅視昔工倍加
焉費實三倍之墩仍五東西首兩亭一以祀大士一
以祀真君始事於丁巳孟秋告成於嘉平之臘行者
翼翼如履康衢焉今年夏余得請歸拜省膝下而前
爲壽曰橋之役大人得無勞乎功德無量已家大人
日樂此不疲獲有成績邑士民之幸諸君子之力也
吾何功之有居亡何前後共事諸君來謁予曰惠德

輿梁不世之功也而成以不日人其詫爲神助迺其
實心激勸悉力調度盡神鼓舞而潰於成者非而翁
不及此今邑惠徼福於明德之賜願鐫諸石以志不
朽余惟居鄉立朝以德行惠鈞各有所濟而澤之普
而永者無數橋梁爲王政首務時余叨典銓政方矢
公矢慎以爲國樹人家大人爲政於鄉橋爰以成而
往來利焉張司空之惠德庶其永孚於休矣微前後
共事諸君之經營當不及此諸君曰是不可以無紀
因綴茲質言以記之若夫輸金者若而人舊創始者

若而人新更始者若而人具載別紙茲不再贅
崇禎九年邑庠涂大呂糾衆重建

皇清順治十七年里衆復脩之

西城橋

明弘治中都人楊禎祥薛玉成等建石墩木梁有屋

瑞溪橋

四十七都里人楊振邦建又有小橋都人丘敬宗等建

安濟橋

小西門外舊志云宋建而廢

元延祐申縣尹王瑄建至正間富民楊英甫重建

明正德十五年知縣蕭一中復建工未畢被召命去

嘉靖三年知縣良珮繼成之○

太常少卿夏良勝記云

建昌郡

治當盱水涯而合黎以委於汝自盱沂黎而上源出

閩嶠亦數百里其中停滯處曰黎灘昔爲鎮後置新

城縣云縣僻土沃以衍民不出游貨而自裕是故易

動以義於郡爲善邑多更良吏治凡百廢有舉無壞

近治自延祐間建二橋上游曰通濟下曰安濟相去

纔二百武末樂間安濟橋壞以有通濟民弗病吏弗

爲意正德末造通濟又壞民甚病之以時詘無贏舉

代以舟渡華容蕭子執夫來令政應時舉罔不戢視

民之病濟由已也詢於衆而樂從請於當道而可伐

石鳩工戒事致用垂成潦水暴至而壞與人謀曰是當峽溪束水而衝撼激射若非安濟下流衍緩先成以壅之懼弗底績蕭子是之求安濟遺跡以有事雖煩復倍費不以勞息惟末逸是圖工及半蕭子被召命去天台葉子敬之繼政猶夫蕭子也倡以已俸之緩重以士大夫之助激於義而樂有所施適清湖汪子擁節按治而輸庸聽以度支獎掖用成凡爲石墩九甕八疊鶴木高二十丈甕架梁木修四十有二丈廣二十尺梁中建亭三左右翼覆以屋爲楹三十有

七兩涯闢塗道東築城門一西築堤以捍殺漲嚙延數十武縣耆老何基鈕鵠介鄉進士王汝學狀役斯紀揚以無忘令德余詞也鄙而遷途倥偬久無以應協諸義有不能避也往者謬屬典銓擇吏是職而嘗載筆志局外史責也故於新城宦蹟得陳先生員韜者去數十年民愛之烝嘗有事如生焉余心師之近若蕭子治不數年民服之遺跡所及如在焉故余友也茲若葉子足以繼蕭子又生陳先生之鄉有不出戶而得師者固余選而任之意嗚呼末世滋僞吏職

苟偷友道衰喪佚已而忘人之勞樂已而遺人之憂
專已而害人之成者何限乃若蕭子深切行人之憂
葉子懼墜前人之蹟至於忘已應人而上下孚若交
濟其美豈惟吏職稱治亦友道之近古可紀若夫蕭
子屬予薦稿而去葉子屬予銓法而來義不避役獨
紀橋成而已哉蕭子一中葉子良珮執夫敬之其字
也

嘉靖五年知縣范惟恭重脩

皇清順治八年辛卯邑人楊國魁捐貲重建石墩木梁併

脩築橋西石堤

○進士嘉禾湯紹中記云

南豐湯子來遊新城

寓溪橋之西涯而橋適壞其里中人鳩工而作之暑
雨不怠甚勞也湯子過而勞之則曰往斯橋之地吾
儕竭心思疲手足而費財今者用吾心思手足而已
奚其勞湯子曰橋之費不訾財於何出曰邑有長者
任其費夫無所爲而獨任之者也湯子作而嘆曰美
哉在昔王道之行利民之政百廢具興徒杠輿梁及
時而就其時牧民吏無敢以爲事小用曠厥職乃吏
不爲民謀而民第自爲謀又民之饒乏有殊苟集衆

謀之築舍道傍而已今舉吏之所不舉又獨舉衆人
 之所不能舉豈不甚美而可嘉哉因爲退考志載是
 橋興廢屢更嘉靖初華容蕭公執夫伐石鳩工戒事
 未畢被召命去天台葉公子敬繼之而橋成鉅今百
 五十年而無有踵其事者君子可以觀世變矣於是
 亟求長者名則曰楊君元卿也湯子曰美哉予固得
 而交之宜其有斯舉也里中人又言是橋礮石當中
 流者四乙酉水大決隤其三蓋礮石太促水無以泄
 其勢故壞辛卯秋遂撤中一礮不治水以不患而梁
 脩七十尺有奇其力弱且豫章之材不常覲也是役
 也謀移舊一礮居中仍省其一而三之其梁五十尺
 有餘然計費則五百餘金矣衆方難之而楊君曰無
 難也久而不弊何惜焉於是一如其謀而成湯子曰
 天下事有其心者苦於無其力有其力者苦於無其
 心心與力交至而美以成後之君子識之哉

合溪橋

與西山對望

鷓鴣橋

距弋陽隘五里石橋有屋

靈山橋

西北五里靈山寺前

吳家橋

坊北

一溪橋

十三都

元至正間里民募建石墩石梁明嘉靖中楊溪大溪二水激射垂圯鄉官王祿力言於縣於橋兩端增築石堤橋始不壞○司成王材記云縣之北五里爲楊溪故有橋曰楊溪橋江閩之孔道也黎川經其左溪出於下者百武而合於黎遡溪三里故有高陽陂溉田數千畝陂敗決久矣每春夏雨集百穀灌漲溪湍瀾大至無所殺而川日盡啗橋之壩絕溪之衝益迫二流交

激乙巳春橋已大壞行道者病之先君退耕於溪之上垂二十年矣雖生事殊微而村里之民卽銖勺或旦暮之求無或厭怠者里民日用頗恃以不恐乃相率以橋爲言先君曰是吾心也蓋慮其漸甚久而制其因甚詳圖其末久甚不敢易則首築高陽陂減溪之奔放築堤於橋之左止川之旁射乃始治橋陂之高者尋有半其廣六尋延翼而高者又六尺其厚五尺其長二十有二尋堤之高十尺張而折者十尋橋故五墩墩高十尺有奇廣六尺長各二尋地者作之

缺者完之、梁之以脩、石咸如其故、而梁之石、加故四之一、自破而堤、而橋、其工皆石也、諸物力之費、始聞於縣尹劉君志學、二尹唐君銳、稍治其罰金爲之主、邑之經行、一二願助者、聽之、其成、則先君任之、經崇庫度、迴逼、琢堅、伐喬、抵深、畚薄、壁崩、膠泐、堦窾、平巖、皆先君臨視、無虛日、橋既成、近溪十里間、田得陂、以腴、橋之南、前陳蕭二令遺愛、去思之碑在焉、賴堤以不墜、橋之北、俯川之田廬、且數里、賴堤以不致觸沒、於是衆相與鼓枹、譙呼、樂是舉之利、不獨行道者之

爲恩也、因易陂之名曰王公陂、先君別自號一溪野人、衆遂易橋之名曰一溪橋、咸願樹石以紀、越二年、先君即世、衆亦念之不忘、以予還守、苦廬相謂曰、一邑之文固在是、且分則宜也、而復何適、予不敢辭、技泣而書之、因感其侗、直不疑於所請、有徃古之風焉、豈誠知龍門河汾稱述其祖父之遗迹、而無避也哉、

皇清順治十五年丁酉、邑人楊國魁捐貲、特建石墩木梁

構磚亭、溪岸爲徃來風雨之蔽、

○知縣卜夢熊記云 戊戌秋

予蒞茲土、比入境、距城五里許、見道左有石梁、方構

問之人曰此故楊溪橋也屬孔道多歷年所每春雨驟漲濤湧波瀉硤水奔激修而復圯者數矣近歲妖蛟鼓浪益崩頽莫制邑善人楊子國魁蒿日病涉捐貲特建爲易其名曰楊興橋予時心喜邑有好善者領之後蒞任楊子庭謁予因語及建橋事且道鳩工庀材鑿石估計費值若干因再拜前請予爲紀其事予嘉其慷慨好義爲勒石紀功以著其績計橋凡四墩高一丈五尺橫廣七尺直延二丈五尺覆以瓦屋甃以石版費鏹一千五百有奇於丁酉春經始迨戊

戌秋落成楊子名國魁字元卿屢經各臺使所旌獎善人也

康熙九年庚戌大水石梁復圯楊國魁重新之

利涉橋

十三都通藍澣廩山明萬曆間里民衆建石墩石梁有屋

皇清康熙九年大水衝決無復脩者

百順橋

舊名仁風橋在百順舖前

皇清順治十六年里人楊國魁捐貲重建石墩木梁○里人

鄧玉記畧云

橋當郡邑孔道乙酉歲江水漲裂梁折墩圯涉者病之楊子惻然捐貲鳩工不踰歲而橋成墩三

高一丈三尺橫廣六尺直延二丈一尺費貲六百有奇經始於戊戌十一月落成於己亥十月

云云

朱家橋

八都

禮義橋

在禮義舖前有橋庵

忠孝橋

禮義舖北五里

新溪橋

地名飯籬墩里人李希元募建

資福橋

昔名千竿橋相傳昔有傳舍在溪東居南城縣官與里人索竿或對無乃告曰當喪爾千竿遂遷新舖於

溪西意以重困里保使造橋橋成俗呼千竿橋後有郡幕王同過此令舖遷還溪東此橋廢復建易名資福蓋以祝王幕云

萬壽橋

在縣東三十里舊爲渡明洪武初始建橋石墩木梁有屋名五福橋相傳欲鄉村之民安樂而受福故名後里衆糾脩因改名萬壽

皇清順治九年寇燬止存石墩十三年蛟出大水衝圯

康熙三年甲辰邑人楊國魁捐貲重建石墩石梁傍

建小庵煮茶以待往來行客

邑進士涂景
祚記畧云

邑東有五

福鎮距城四十里許爲江閩孔道其仕宦商賈舟車
負擔之往來肩摩趾錯晝夜無停晷河流自石碇奔
注抵硝石入大江鎮所跨有長橋名曰萬壽所從來
舊矣歲久漸圯傾民病涉識者憂之予媻楊國魁好
義樂施力行善有年其貸粟掩骼塑像建亭諸懿蹟
未易更僕數而造橋爲尤著予里居時造城北楊興
橋費以千數百計橋成而楊子若無與也時則有甬
上卜侯夢熊爲紀其事未幾又造百順橋距城二十

里費以六百計時則有同里鄧君玉爲紀其事迨予
官粵東客有來言於予者曰楊子今復造城西安濟
橋矣費且五百計橋成而楊子仍若無與時則有嘉
禾湯公紹中爲紀其事未已也越歲餘客復有來言
者曰楊子今復造城東五福鎮之萬壽橋矣道旁復
建一庵設茶水以供往來之渴者費亦且六七百計
楊子無吝色無滿志一如其建楊興百順安濟三橋
時予聞而嘉歎久之客曰前此者有記矣卜以宰湯
以鄰鄧以同里子與楊子媻也可不踵而記之以彰

厥美予曰唯唯否否遂記之歸以遺楊子而命匠氏鑄諸石

壽昌橋

在石碇鎮前通杉關要路明壽昌僧慧經禪師募建其徒元謐糾脩石墩木梁覆以屋

皇清順治十三年水衝圯市衆復糾葺之

硝石橋

在南城縣硝石

舊爲官渡本屬南城以新城要路舟夫工食編載新城賦役文冊錄入舊志明崇禎間邑冢宰涂國鼎建

石墩石梁覆以屋

○公仲子斯皇記云

愚竊謂士大夫家居

者二其一千金市駿萬錢供七錦帳繡幕楚舞吳歌

若者人艷其豪其一池館臺榭花卉竹木購奇寶異

羅致森列若者人服其高求其聲伎之暇泉石之餘

慨然恫心民瘼者幾人哉減聲伎泉石之十一以軫

念桑梓者幾人哉若予考太宰公則異是先公非公

宴壽辰未常張樂設筵也後房不過數人侍巾櫛司

服御而已未嘗翠袖如雲也有園一區雜植數十種

圖書數百卷適志娛情而已未嘗妖艷盈階古鶴盈

几也至於軫念桑梓恫心民瘼則傾囊倒篋輸所有以佐需罔或怠是故常發廩以賑饑民矣鉸感應篇以勸爲善矣倡脩惠德橋以便通濟矣捐數千金繕城以奠鄉邑矣諸如此類未遑殫述乃先公之意則又於硝石橋目擊心傷有愠乎其不自安者硝石故盱黎孔道負販小民往來輻輳者何可勝數其富商大賈魚鹽布粟之利咸於茲取途焉遊宦過客相望於道郡邑文檄徵發且日夜不息也惟是波臣爲虐嚙石衝岸雖非若瞿塘灩澦而褰裳濡首淪胥載溺

者蓋不少矣先公曰噫吾烏忍魚鼈斯民也於是架木連雲甃石浮空既堤河而障江爰列楹以覆瓦向之巨鰲掀浪者今且長虹飲澗矣向之洪濤拍天者今且砥柱中流矣曾幾何時而廕若夏屋息若郵亭馳驟若履康莊也嗚呼彼歌攸往頌利濟者亦知我先公軫念桑梓恫心民瘼有如此哉或曰泉石聲伎之樂古有其人矣若裴晉國之別墅李贊皇之平泉郭汾陽之豪華富麗非與噫此其人皆勲業垂世德望時著也後之人其勲業德望不如裴郭諸公者尚

桑梓民瘼是念無徒耽奇玩物樂奢從淫庶幾在朝
在野猶不失爲賢士大夫也哉

津渡

龍安渡

在龍安鎮

疇溪渡

在四十二都坊民瘼祐捐田六畝瞻渡

下田渡

在十五都守渡有庵都民席福一捐田六畝太平寺

捐田十二畝瞻渡

黃沙渡

在二十五都有名無渡舊有觀音橋今廢

孔家渡

在橫港橋久廢

峽石渡

在縣灌湖久廢

硝石渡

係官渡本屬南城以新城要路舟夫之費出新城故

舊志載入今建橋

井

聰明井

在學宮有王荆公筆書聰明泉碑

石龍泉井

見日山

三星井

在縣治前

白鷺井

在程家嶺水清冽甲他井

銀城井

在五福汪家源居民盡飲溪水獨此井水香冽甘美

隱泉井

在十七都其井銅底相傳唐宰相鄭畋鑿今廢

丹井

五十四都冰壺相傳南豐道士王侍宸煉丹於此因名

唐家井

在縣北吳家橋側

井溪

在縣東四里

塔

報恩塔

在縣東城中報恩寺

元至正四年閏二月邑人王三錫建

明崇禎七年邑里衆重脩

皇清康熙九年邑人涂大益糾衆復脩

堤

新堤

在城北門外向爲暴漲衝決明正德辛巳知縣蕭一中始作石擺又作木擺數聯於其下流後木擺歲腐官道傾沒嘉靖癸卯知縣劉志學作石擺於狀元坊崇禎九年知縣楊榮建築石堤百餘丈沿涯樹以槐棹爲篆碑曰新堤

西堤

在安濟橋西明嘉靖三年知縣蕭一中葉良珮建安濟橋西築石堤以捍殺漲嚙延數十武

皇清順治辛卯邑人楊國魁脩之

水碓

附

船碓

黎川舊多石湍水勢潺湲邑人構船作碓水激輪轉每船置六杵其中不假人力杵聲昏旦不輟自邑南至北灘可數十餘艘

岸碓

於石灘岸傍建屋作輪置八杵其中壅水激輪流轉疾於船碓村落溪湍處多有之

船碓

村落灘水小處僅可容一白置木杵其間剛半爲槽
引水注之水溢杵春山村溪湍處恒有之

以上三確亦邑中自然水利舊志未載今補入

寺觀

廣照寺

在城中東山下宋皇祐二年僧西竺建舊名新興院治平初改廣照寺明永樂十八年僧益謙

山傳竺宗重建萬曆間禪師慧經復建今康熙十一年僧宜珠修之

東湖寺

在東坊寺前有小湖舊稱彌佗寺宋紹興十年建明歸併報恩等五院爲叢林改今額

知縣周天德糾衆重建修濟前湖有記云余若二年新城之災於火數矣因惟詢其故里老爲余言城東東湖寺前有方池可半畝許渟瀦最深邑西日山正當其前與相照映形家謂山形屬火在西茲湖

在東可免火患今歲久埋塞故祝融疊見濬之可已
余從其言與城守何君承統糾邑紳里衆募工濬之
甃以石檻而火患果息越四年庚戌寺僧余樂善携
募緣簿來請曰寺前方池幸賴糾濬邑人食利已有
成驗矣而佛刹傾圯佛像露棲祈爲序募建余爲首
捐百金復糾邑諸紳里助成厥事越二載而刹成又
爲塑新佛像壬子復創外殿山門寺基之屬於民著
爲贖而拓之寺於是煥然改觀樂善丐余爲記其事
余考茲寺之建始於宋紹興之十年初名自蓮堂前
鑿方池亦名白蓮池構小亭其中元初邑多疫池湧
甘泉汲飲者輒甦當事爲請於朝賜額彌佗寺明始
改稱東湖蓋因寺前小湖而名之也夫以未及半畝
之塘乃輒以湖名之豈非欲其澹涵深蓄比之巨浸
以與山方張之敵相抗衡也哉然則茲湖之關係
新邑匪眇淺矣則余之興是役也蓋亦寓捍患禦災
之意自非可與崇信浮屠以祈福田利益者同類而
共觀之也因爲
述其意而書之

淨居寺

在城內東山下唐咸通十二年建在縣南三十里宋治平元年改建今所明歸併為叢林舊

僧會司在焉後燬於兵今寺僧五雲重葺後院

報恩寺

在縣城中東湖寺後有浮屠塔元至正四年邑人王三錫建明崇禎七年重修今康熙九年

僧衆重修

天峯寺

在縣西一里舊名望天峯元延祐甲寅改建稱新興院明僧衆重修改今額皇清順治間寺

僧重

寶林院

在縣西北二里舊名定光巖明洪武間重建改寶林院司成王公材嘗寓讀於此因扁曰堂舊

隱詩云門外新篁籠遠甸山頭古壁駐輕霞是也

靈山寺

在縣西北三里宋建隆元年建治平初改為靈鷲山明仍稱靈山寺邑今湯建衡詩云閒訪靈

山水竹居試從方外肅真如數株老樹風煙表滿地落梅春色餘野衲逢迎疎禮法塵寰奧寂付乘除探

幽謾訝歸輿晚樂事尋常任太虛

龍湖寺

在縣北郊龍湖山下舊為廣祐福善王行祠元至正三年建明嘉靖中燬改邑厲壇崇禎間僧

元謚重建侍御鄧澄有碑記

般若林

在縣南菖蒲橋打漁州明崇禎末僧正元建今重修

寶山院

在縣西五里十二都元至正間建久廢

白石寺

在縣西二十五里十九都舊名院今稱寺

正觀寺

在縣西南二十五里二十四都宋開寶中建舊名院今稱寺

大通寺

在縣西二十里二十二都舊名龍安院宋治平元年改大通院今稱寺

慈澤寺

在縣西三十里四十二都宋開寶中建
舊名長興院治平初改慈澤院今稱寺

幽棲寺

在縣西北三十里十九都舊名棲靈院
唐光啓二年建宋治平元年改幽棲寺

福勝寺

在縣西北三十里十七都舊名招福院唐同光
二年建宋治平初改福勝院今稱寺○布政使

南城張思詩云偶拋書卷得閒遊山寺蕭條鳥自幽
雲徑幾灣堪縱步月池一樹可容舟山形瘦削秋將
老樹影參差翠欲流為愛老
僧能習靜扃門未許俗塵投

福山寺

在縣南四十里二十四都一名雙林寺唐廣明
元年僧紹隆棲隱於此宋大中祥符中賜今名

元延祐間重建明歸併白石等六院為叢林福山田
地多五代時危全諷兄弟施給寺僧鑄全諷像為堂
祀之○通判清州徐徽詩云青山高百尺招提居崔
嵬捫蘿上風磴下視白雲堆我來適冬仲初霽收浮
埃丹青間草木點綴新陽開水石發佳趣松杉韻餘
哀比丘有聽雲據梧心死灰虛明丈室地淡煙杳徘徊

徊語人無一法是處實幽哉明朝送我歸却下文殊

臺○又詩云招提訪舊遊曉色弄新霽霧寒朝未收

山高日猶晦散石卧牛羊亂水流經緯發聞松杉音

寂滅市井議雖云仁者靜相聽楚然喜我世靡不更

此生復何冀當為爛遊不作須臾計崎嶇極霽攀

窈窕容幽邃散策無前期延賞有佳致行逐好風來

坐看歸雲曳冥鴻將興遠倦鳥與心會相見總無言

笑領西來意○危固贈字老詩云覆船山色翠峩峩

栽石藏雲不厭多達理禪師起彼岸莫疑身外有風

波○傅翼詩云隱隱晴空露翠微也知深處有禪扉

幾回待入烟霞去只恐烟花不敢歸○又詩云名利

拘人不暫閑美師高卧白雲間白雲不鎖幽深路終

約烟蘿一扣關○傅權遊福山寺訪顯公詩云來尋

大知識深歷幾重山崎嶇最高處迢遙自在間簷寒

流水入窻暗宿雲還竊

喜逢平叔清談屢破顏

慈源寺

在縣北三十里十都舊名鶴源寺因有鶴翔翔
水上故名宋治平元年改今額明歸併西林寺

六院為叢林宋令楊傑有鶴源院銘今不載

澄心寺

在縣北十五里十一都舊名龍安院宋治平初改澄心院今稱寺

東林寺

在縣北二十里八都南唐時建宋治平間重興舊稱院今稱寺

廣嚴寺

在南十五里三都宋開寶中建名龍遷院治平元年改廣嚴院今稱寺

真覺寺

在縣南二十里五都舊名南賢院唐保大中建宋治平元年改真覺院今稱寺

覺慈寺

在縣西十五里十一都宋開寶三年建今康熙十年重修

南谷寺

在縣北十五里八都南唐保大中建舊名龍安院宋治平間改安福院明弘治間僧息庵遷居

九都西坑南谷在縣北二十五里皇清順治戊子燬壬辰僧元諡同僧道信衆建康熙元年請禪師墨歷王法席改稱南谷寺有望廩山詩云高卧山頭不見山別從南谷望雲間有時風掃青螺頂一筆參

天自破顏晦山禪師詩云綠竹晝陰陰層巒幾曲深擊來因有節響處在無心茶白三杯水梅黃一樹金

出門纔曳杖惆悵北丘林康熙癸卯僧道蓮西勝修

妙靜寺

在縣西北四十里十七都舊名中山寺宋治平中建淳熙十年改妙靜院後稱寺 皇清康熙

十年僧衆重建

長慶寺

在縣西二十五里十九都舊名再興院南唐保大中建宋治平初改長慶院今稱寺

安聖寺

在縣西五里二十一都南唐保大二年建名橫崗院宋治平元年改安聖院今稱寺孔廕詩云

再入招提境何人誦法華鐘聲斜出樹殿影暗藏花貪佛還留宿隨緣且飯麻平生愛出僻足跡遍僧家

明因寺

在縣南二十五里二十三都南唐保大中建舊名院今稱寺

淨明寺

在縣南三十里七都宋開寶中建舊名院今稱寺

長寧寺

在縣西南六十里五十三都宋
咸熙五年建舊名院今稱寺

禪悅寺

在縣西四十里十九都南唐
保大中建舊名院今稱寺

惠日寺

在縣東北十里十四都宋紹興三年建明歸併
妙智七院為叢林○程新詩云蘭若何幽寂深

藏碧嶂陰香含簷菊蕊啼切子歸音虎卧山
堂冷龍潛鉢水深何時逢惠遠結社後來尋

妙智寺

在縣北七里十三都宋開
寶中建舊名院今稱寺

超覺寺

在縣東三十里四十都舊名雲峯
山宋治平元年改超覺院今稱寺

寶慈寺

在縣東四十里四十一都舊名報恩院南
唐保大中建宋治平初改寶慈院今稱寺

梵安寺

在縣東五十里三十三都螺蛭峯舊名
永泰寺南唐時建宋改梵安院今稱寺

壽昌寺

在縣東興鄉石硤距城四十里唐咸通間僧泉
南桂琛始建永居院宋治平紀元間賜名壽昌

院元皇慶壬子年僧雲白了心重修明洪武癸酉年
主僧宏遷建其基於黃龍峯下請釋西竺任持永樂

初僧元偕徒荆山重建正統丁未僧越善重建丁卯
奏議贈賜壽昌禪寺禮部尚書胡濙撰碑記萬曆戊

申釋無明重建 皇清
順治十年僧竺庵復建

廣福寺

在縣東五十里三十三都宋淳熙十三年建舊
名院今稱寺○危固詩云二月楊花蒲地飛

鶯簧清巧弄晴暉誰知騷雅尋芳客寂寞東風馬上
歸○傳權詩云古木荒涼近水涯鍾聲朝暮落漁家

昔年縱跡曾經此
依舊殘陽照晚霞

瑞巖寺

在縣東南五十里三十一都元
至正十一年建舊名院今稱寺

西林寺

縣北二十五里十都南唐時建宋治平間重興
舊稱院今改寺○元危固送僧詩云振楊西林

去清閑禪所依高巢孤鶴逐深谷片雲歸野色
供吟筆秋光射衲衣長亭攜別去落日半沉暉

香山寺

縣北十五里八都舊名再興院宋建隆三年建慶曆間重建改名香山院今稱寺宋王无咎香山院佛殿記云慶曆五年香山院僧延香會予於逆旅從容為予言師守能近更治其院其堂室門廡以及器物百須粲然一新唯佛殿之役力猶未暇蓋計其費當用錢五十餘萬而吾師生平所有多委之以治其院今料其餘總能資其半又其半尚待香句里人之貲以足之為是故未暇也既別十四年矣復過予而言曰香向嘗語君將新佛殿爾後即區區間聞間家勸戶誘而資施之人無間多寡悉受而哀之如此者逮十年而功始克興其培基購材募工僦庸周旋經始又若千日而其役乃成香於此信乎其勞也初吾師勞於院事而得今秘書丞陳君諫為之記今香勞於殿事而更欲以記累於君願卒聽之也今夫世之浮圖挾其法以自封於已者踵跡相接而勞於已以圖振其法者其間蓋少就吾里以求之則香殆其人也余既與之有一日之舊而又嘉其能自異於其黨故不拒其請而書其所嘗語於予者以畀之時

嘉祐三年三月也

記云香山古刹也昉於宋紹隆禪師誅茅闢基自宋迄明其寢廢而寢興者僧守能延香暨有淮三人宣力最多脩載於陳君王君西碑文中彰彰在人耳目聞遭時灰燼皇清順治庚寅僧因宗同寺眾修證敬容惟鑿等乃捐衣鉢而鼎建之予謂不廢者萬古之空青廢而復興者一代之莊嚴因宗等續紹隆能香之一燈振有淮之業於未墜使高臺古樹雲遶一半厥功豈不偉哉是記

興福寺

縣西北二十里十八都舊名新興院南唐保大中建宋治平間改興福院今稱寺

崇果寺

縣西北二十里十七都南唐保大中建舊名院今稱寺

祥雲寺

縣西二十五里十八都明洪武十六年建舊名祥雲院今稱寺

資福寺

縣西三十五里十七都宋開寶中建舊名院今稱寺

吉祥寺 縣東南二十五里二十五都吳武義三年建名曰新開寺宋治平元年改吉祥院今稱寺

普光寺 廢久

大覺寺 縣東二十里二十七都舊名水口寺宋治平元年改資福院明洪武三年改大覺院今稱寺

明性寺 縣東南三十里二十九都宋開寶中建

妙法寺 縣東南三十里三十都舊名蟬鳴院宋太平興國元年建治平初改今額有無任雪堂二僧肉

身後燬元末燬于兵明洪武七年重建二十七年因寺僧眾獨為叢林萬曆未僧桂穀重建 皇清初燬

如陞稍為修造 康熙元年海金自閩邵籤竺峯來携資重建

慈明寺 縣西四十里四十三都舊名南光寺宋開寶中建治平初改今額元末燬于兵明洪武十一年

重建二十七年奉例歸併法興等十院為叢林僧眾重修臨川吳與弼詩云一宿蔚藍天炎襟自洒然

五更涼夢覺
心賞淡無言

法興寺 縣西南五十里五十二都唐光化中建舊名院今稱寺

圓通寺 縣西南五十里四十五都明洪武元年建舊名院今稱寺

永隆寺 縣西南四十里五十一都宋開保中建舊名院今稱寺

普薰寺 縣西南四十五里四十四都宋淳佑年建舊名院今稱寺

清梵寺 縣西南五十里唐廣明元年建

古佛寺 在縣西七十里四十七都

廩山寺 在縣北十五里宗光宗紹熙一年建明弘治八年僧道智蘊空重修天啓丙寅僧德和復建

皇清順治十五年僧映初重修山人江佩棲隱茲山有詩云石磴高干似蕭條古梵宮吐香擎間草倚翠

偃巖松花意涵青叔心團展淡濃謁來深夜坐孤影
嘆飛蓬○物理觀無盡秋光戀薜蘿閉關鍾磬寂伴
客水雲多雨過花猶濕林青鳥獨歌江流烟樹外山
逕少人過○巖居頗閒寂萬木自陰陰齋鉢分僧饌
雲毳禪客衲取物淡如此離塵懶
重今向來寥廓意俱付一清吟

廩山塔院 皇清順治十七年僧墨歷建

信嚴寺 縣東三十五里四十二都

淨嚴寺 縣西北四十二里十七都

天堂寺 縣東南三十里六都 鄧元錫嘗讀書於此

洪濟寺

孤峯寺 東北十四都 舊稱孤峯院

淨蓮寺 縣東南三十五里二十九都 舊名蓮江 唐太和

霽桑柘猶鳴鳩時序屈寒食展誠向松楸招提聞遠
鍾隨聲步村陬蓮社空遺址水竹雅陰幽拂石卧紫
苔雲氣交前疇晉連更盃酌蕩滌塵寰
愁興來灑蒼煙古壁記新遊○寺久廢

金峰寺 縣北七里十一都 元至元二十八年建 舊稱院 皇清順治十七年重建 今稱寺

章山寺 縣東四十都 舊名院 今稱寺

東巖寺 見東巖山

上方寺

興覺寺

龍福寺

黃沙寺

延福寺

廣度庵

在縣西黃沙坑

何嶺庵

在縣東南三十一都

什邡山庵

在縣東南三十一都

中羅山庵

在縣東三十八都

雲峩峩

瑞龍院

在縣東四十都

大鷄峯庵

在縣西南四十五都

淨土庵

縣南城外鷄冠山

藻林庵

縣南城外柞坑

禮義庵

縣北三十里八都禮義橋

鶴仙觀

在縣城東環勝山下宋始平元年建在邑東四十都何家庄紹興中遷今所元至正元年道士

江希達號無隱以道術顯於朝蒙賜劍以歸去作高閣藏之元季燬於兵劍與閣俱不存明洪武中奉例

歸併仙居等八觀為總觀宣德間重修今道會司在焉○元謝升孫劍閣記畧云昔漢帝作樓觀候神人

觀之名昉此新城鶴仙觀舊在郭外二十里荒廢湮沒僅存虛名宋紹興間道士黃道全承邑宰命徙之

郭內又百三十二年而江南內附法師江希達二月以符水遭世祖黃帝屢奉玉音顧問特賜寶劍以歸其

徒丘允經新作樓七間為方丈樓上立宸光閣奉安寶劍東西小樓翼之西復建一樓扁曰靜齋蓋其修

真立靜地也至元四年戊寅正月記

仙居觀

在縣北隔溪二里與石硤嶺相對舊名雲龍殿後有唐鄧仙師延康墓宋治平元年改額仙居

後人模擬尸解之說遂謂棺中止存劍履相傳考黎

川一景唐宰相鄭畋為誤墓銘刻石廡下歲久屋廢

惜其石而寶之因取歸置佛殿側數日大雨震電及

暮祥光矚天其徒異之復徙銘石置舊焉而祥光乃

息天聖末富春宰公視其遺跡振山水之會而圯壞

若此乃鳩工葺之觀宇復全熙寧六年里人丁夢臣

拂拭舊碑模本再刻新舊二石並存觀中元末燬于

兵塚一遂廢明洪武三年道士嚴鈞隱重建

觀宇塋仙塚止一空塚耳諸詩見馬鞍山下

竹山觀

在縣西四十里二十一年建

鬱羅觀

在縣東四十里三十八都中羅山宋大德中建

萬安觀

在縣北二十里九都禪山元至正九年建

逍遙觀

在縣南十五里三都宋開寶中建舊名龍華治平元年今額

顯佑觀

在縣南二十里坐禪山吳元年建

都仙觀

在縣東七十里三十九都白雲峯宋咸熙五年建

真應觀

在縣西四十里仙臺山元至正元年建

賜福觀

在縣東北十五里十四都

仙山觀

在縣西北二十里十五都

麻陽觀

在縣西北四十里十七都

玉清觀

在縣西四十八上都

棲靈觀 在縣西北二十里十九都

玉隆觀 在縣西四十八下都

長生觀 在縣西五十二都金籠山宋治平元年建

太乙觀 在縣北二十五里入都梅峯宋紹興中建元至正中重建翰林學士南城程鉅夫有記

興靈觀 在縣西七十里四十四都元至正五年建○提學副使華亭夏寅有詩二首

大有觀 在縣北十五里十一都金船峯元至正戊子年建○邑人江以碩有記云真人姓汪諱朝道號

月澗信州龍虎山人學道有得入武尋修煉者十餘年遊黎川觀金峯秀異見一谷龍蟠虎繞山峙水環

日此吾全真地矣爰立茅廬及元至正庚子勅建道院先明洪武十二年賜名大有也山故無水取劔劈

石涓涓流出味甘而性冽餘波及田畝者灌溉且數百鍾蓋三百年於茲矣居恒嘯咏高峯或與道人言

或對樵夫語世卒莫得而相之其天全其神凝耶尤精法術日岫丘真人亦善祈求兩人戲以茅置淨甌

水內訂以石硤嶺上為丘雨下為汪雨刻期皆應常牧牛牛渴偶于山巔踏地而坎之未盈尺許牛飲不

竭天雨恍若雲霧噴其上歲旱遠近祈禱者輒攜缶取水歸甌沛然其道術靈妙蓋如此至正十五年為

羽化之期先數日躬請山隣如約至則已坐化巨桶中矣道衆瘞諸本山雷壇之側其徒李大顛訪道京

師忽見真人至修書回山字畫如生比旋山中長逝已半載啓桶遂將靈骨塑像蓋至今猶存也憶少時

偕弟觀其氏寓讀其中愛山水清曠暇則提蒲團憩坐峰頭惟覺靈氣往來別有天地豈山以人異耶人

以山異耶抑山與人靈光秀氣相為徘徊耶山嶺禪院則有楊子因之香山蘭若則有涂子子期皆赫赫

若昨日事予嘗同甥楊君東曦夜坐忽三鼓聞異香馥馥越兩日復然癸酉秋余方束裝鄉試是夜洪鐘

自鳴其神靈繚繞久而彌彰又如此迨宦而之哀之饒之河北公餘宴坐儼若置身山青水綠間恍惚與

仙真相接及歸而詣謁道侶黃伴樵張若虛已於
皇清辛丑秋肯構而聿新之山之童者鬱然林之萎
者翦然皆真人之有以默佑之也予聞修真者流壺
中日月蓋不可以年代計其翊陰陽贊化育以道術
利濟者時亦有之彼其鸞翔崆峒之表鶴遊廣漠之
鄉視滄桑等浮漚耳曾一丘一壑足以奇其高蹤哉
真人眷顧此山而為霖為雨惠澤斯土者又豈禮所
云有功德於民者則祀之耶予故撮其大要若其他
靈術奇驗稍涉誕異者概
不載寧從闕疑之例云

東嶽行宮

在縣北石
硤嶺外

玄帝宮

一在城中東山
一在北城樓上

三元宮

在城中東
山敵樓

文昌閣

一在南城樓
一在北門外

真君閣

在縣西
惠德橋

蕭公殿

一在新豐橋
一在五福鎮

古蹟

東興縣

三國吳置在今縣東北三十里
東興鄉石門里今地猶名城口

永城縣

三國吳置在今縣北
三里今地猶名城頭

勅書樓

在今縣治前宋縣令趙
觀建詳見縣治屏牆

尉司

在縣治南按察司右宋紹興
間縣令趙公輔建元末燬

清心齋

在縣
廡中

茅齋

菊坡

春亭

近民亭

清涼境界

以上俱縣廨後圃宋嘉熙間縣令趙瀾夫建紹興間燬

藏書閣

在儒學講堂左元進士朱倬建後燬明改建尊經閣亦燬

稅課局

宋置明天順間裁革歲辦課鈔入縣帶官

酒稅務

在縣治西宋紹興間以武臣監酒稅元至正間燬明洪武中知縣田嘉奉制建改各稅課局正

統年革

楮儼稅務

宋置在縣一四十二里今市鎮無

惠民藥局

在邑治之右按惠民藥局自宋元有之明洪武三年改建醫學凡軍民之貧病者給之醫

藥今藥局久廢

盍簪亭

在縣北二里宋淳祐丁巳縣令趙汝涯建久為水所决

黎灘驛

即今縣治宋紹興十二年縣令李維芭建在縣東二十三年縣令趙公說遷鶴仙觀壇上久廢

鳳池驛

在縣北宋淳祐九年縣令趙與證建內有山高水長樓

山高水長樓

宋縣令趙與證建在鳳池驛元末燬明洪武改邑屬壇後俱為水所衝决舊址無存

三清樓

在盧游後人為宋進士何淵何潛何泓建久廢

飛鳶驛

在縣東六十里宋紹興間建咸淳間縣令王從吉改為巡檢司元因之洪武三年巡檢董成祖

重建後裁革驛令遷杉關屬福建

迎恩亭 宋建於縣北五里楊溪之上元改北門外明初仍建楊溪後又改

安民坊 在縣門東初名厚俗

善俗坊 在縣門西初名平政

諭俗坊 在縣西隅宋紹興丁丑縣令李維縱設粉壁通衢大書天台鄭知縣至道所撰諭俗文誦誘民

處仁坊 在縣東隅宋淳祐間富民陳聖俞以已田作民室因取里仁篇義

崇教坊 在縣東舊曰尊道坊由此謂文廟嘉興間改此名久廢

興賢坊 在縣東隅多士之地與計偕者十數人故名

折桂坊 在縣東隅析縣後劉希旦居此登科故名

興孝坊 在縣西隅宋建民有鑿髓救父者故名

旌孝坊 縣東橫街宋建居氏有割股剖肝救母者故名

望仙坊 縣北隅仙居觀有唐鄧仙師遺跡遊者所必經故名久廢

宣化坊 縣治前自宋以迄於明屢建屢燬

義士坊 元會同知歲飢發粟賑濟故立

聯魁坊 為元進士朱彬朱倬立

孔家渡 縣南二里相傳福山水合黎水處宋咸淳間一夕巨漲衝沙成陸

硤石渡 城北三里石硤仙居二山之間久廢

鯉潭渡 今為橋

五福渡 今為橋

張家營 東南三十里五代亂離時有張營將禦捍於此其南有倬望嶺與邵武為界

石陂寨 宋時巡檢所居名寨不名司今久徙寨中有靜思堂傳默有記見藝文

同安寨 今稱巡檢司

高寨 東南三里界鯉潭龍安之間唐僖昭之代所在盜據而黎汾危全諷之徒相持於撫州南城縣龍安

鄉之高寨高寨之名自此始

石城寨 南十里豐義鄉其地平廣水山環聚世傳黎汾聚兵於此四隅各設門關置保禦今有東門察

州等名迹猶存

石門寨 東六十五里東興鄉水石清惟山嶺環聚中有戰一寨頭牢州城原等名

馮家寨 東二十五里有高山數百仞相傳唐季有馮團將者率民兵作寨於此以保捍鄉井故名

奴歸洲 東五十里東興鄉宋元豐間草寇廖思眉掠入境戎兵於此將官彭左藏下營於飛猿之東村

今有營心上營下營之名存焉廖思招降左藏命曰廖賊乃歸趙家之奴也各其地為奴歸洲久為水決

丘墓

陳

陳高祖霸先祖墓 縣東二十里小合嶺下墓西有東山嶂相傳云初塋時有神人出謂

霸先日可去矣謹勿回首既行三十三步回顧神人日子之與可三十三年而止以史考之陳氏之

先甚微武帝興自閩閩曾經歷贛灘出入吳越二十餘年及享國實三十三年

黃司空法甄墓 司空名法甄崇仁人詳見南史墓在崇仁邑永樂志云故老相傳今儒學

乃司空屋基左有古冢為司空墓歲嘗寓居或卜兆于此耶

唐

鄭公墓

縣西北三十里地名黎源今一鄉多姓鄭以其有公卿墓此地因號公村管或以為唐宰相鄭畋之墓又以為畋子戶部侍郎凝績之墓按唐書畋河南滎陽人舉進士官鳳翔節度使滅黃巢有功卒葬鳳翔後節度使李茂貞為請還葬滎陽長子凝績戶部侍郎畋卒凝績未幾亦卒不當還葬于此但考鄭氏家譜云因避黃巢黨徙居于邑黎源至今公村管鄭家段或畋次凝績之墓

宋

張馬軍墓

在縣南三十里地名斂富嶺其嶺圓平如下日張馬軍宅宅畔有墓墓側常生雲氣相傳宋初閩越竊據未歸馬軍嶺義兵禦於閩嶺屢取勝賊不能入由是江南財用人物獲全功未就而馬軍卒葬于此

余駙馬鋒墓

墓在縣西四十七都大源嶺口紹興十一年許以公主配其子鋒遂得厠駙馬有武功

王進士无咎墓

在縣禮教鄉王安石撰墓誌云君南進士也初補江都縣尉丁父憂服除調衛真縣主簿嘗弃天台縣令以與予共學久之無以衣食其妻子乃去補南康縣主簿會予召至京師因留教授上方興學校以經術造士予言君可教國子命且下而君死君所在學者歸焉賢士大夫皆慕與之游然君寡合常閉門治書唯與予言莫逆當熙寧初所謂質直好義不為利疚於回而學不厭者予獨知君而已君之死年四十有六實熙寧二年閏十一月丁巳至四年二月壬申妻曾氏子綱緝始克葬君南城縣禮教鄉長義里銘曰安時所難學以為已於呼鮮哉可謂君子

鄧安惠墓

在禮教鄉二十五都長義里普光寺後名相公林今普光寺廢

張進士湖北帥機介墓

在禮教鄉二十七都河塘張家嶺有神道

張狀元淵微墓

在廩山

涂團練使百一墓

在城西天峯舊志誤載禮部主事涂順墓百一卽順八世祖也公南

昌人宋紹興中以團練使守建昌當建炎紹興間范汝爲擾建州黃琛起南豐公以團練使鎮杉關保障一方後遂家新城歿葬於此子孫苗裔顯重者軫相接欽敬順國鼎皆其後裔也

朱進士彬墓

在縣四十四都毳狗嶺

朱進士倬墓

在四十八都松山

丁尚書右丞度墓

在二十七都丁家山皇佑三年辛卯同子翰林侍講諷由河南徙居

新城歿葬於此

明

朱助教大中墓

在五十四都前盈山奉勅賜葬

涂庶常敬墓

在縣十四都烏源

何給事澄墓

在縣三十都盧游

鄧僉事義墓

在縣城南屋山

涂主事順墓

在縣城北十一都下池舊志載天峯乃順始祖團練使百一墓也

撰墓誌

涂處士菊隱墓

在邑南楓山

朱知縣徽墓

在縣十三都唐坑

李員外泰墓

在縣十三都楊溪之北

涂知府憲墓

在楓山

陳同知衮墓

在縣仙居觀後太常寺少卿夏良勝撰墓誌

何知府厘墓

在縣廬游門人國子典簿鄧杞撰墓誌

王中憲祿墓

在三十都妙法寺後寺建綸暉亭有誥勅寺左有神道坊編修吳興薰撰墓誌

王司成材墓

在縣北二里北田學舍後山有神道坊明宰相張位撰墓誌

鄧徵君元錫墓

在四十四都下村盤溪司馬許孚遠墓誌南昌萬廷言墓表見藝文

張尚書祖廷用墓

在二十八都壽昌寺後山

張尚書父蕙墓

在三十都金獅坪

張尚書櫬墓

在三十都洵溪茶亭勅賜祭壘建有道神坊新建大學士張位撰墓誌

涂冢宰祖宏墓

在南坊仰天峯

涂冢宰父朝敬墓

在二十六都西坑石磔

涂冢宰國鼎墓

在二十七都黃沙渡元配鄧淑人合葬南城徐芳撰墓誌

涂文學渙墓

在五都長定源雲鴈祖司成王林撰墓誌

涂知府雲鴈墓

在邑北象山王姓同塋翰林鄧澄撰墓記云雷州公沒可若如年諸子奉

公襄事持其狀來徵銘噫嘻戚友中周旋久底衷畢竭幾如公者即徵狀余不悉公耶公孝友至性學問夙契為郡邑羅明德鄧潛谷兩先生所印可起家令鍾禱轉京兆司法移留都刑曹即出守雷

所至威惠歷歷當入雷適旱公虔禱澍雨丘應雷人神之稱太守雨群作歌旱後米踊貴閩賈駕海艘百十來監司郡丞皆閩人陰為地公曰安得束腹而應隣人哺嚴禁而閩艘立引去雷產珠守土者多垂延公一無所取雷還余戲曰其以照乘俱來耶公正色曰君不知故人耶安得以老而易辣益公甫命鍾祥立榜於庭曰三尺矢天地方寸留子孫嚙藥飲水凜凜清白自束矣至其密獲窩結之宿盜從容會勘之楚獄平亭留碍之疑訟捍築澤國之長堤赤心撫字隱慮當機明察淵魚而孚貫金石鍾祥顯陵在焉鎮守中貴素驕橫凌爍令公強項不為屈轉京兆刑即張奴奴藉掖庭乳哺勢子坐大奸公屹然不少借必置法大興丞有鉅援賍私狼藉竟坐譴始至留都一日出大辟五人坐戌二十餘人富民子兄弟爭貲公牖以天性胥感泣輸平司寇丁公聞而曰若涂即者可謂平亭矣公真性素著所至愛人雷人有歌鍾祥有祀祀舉配昌黎暨雷歸春二月屬疾不起為塋後五日

距其生嘉靖辛亥六月五日享年六十有九舉萬曆己卯鄉試公先多耆德曾大父亢大父渙父贈公東臯先生諱秩母贈孺人黃公名雲馬字伯翔別號振宇余親見公庭闈色養口悛悛如不輕道一詞粹衷謹履余每藉公潛消其躁卞嗚呼世嫻密戚生平熟知公執筆銘公感念今昔不自覺淚之承聽也公子女孫曾諱狀中莖以辛未六月墓在城北王姓象山丑山未向銘日起家楚令尹歸良二千石夢鸚鵡而生鴻名應服秋是皆不偶然而公有隱德河海湖崑崙花果山根核用小戒其勤器大收其溢良吏鄉先生後來者矜式牛眠馬鬣封勿穆十則吉鬱鬱萬千秋脈此一片石

黃祠部端伯墓 在縣九都 忠孝橋

丁琛墓 在邑西 水南

丁節中芹墓 在二十七都 水口司前

鄧侍御澄墓

在三十九都盧游

涂節判木墓

在十五都社背岡上鄧元錫撰墓誌

涂國學世聘墓

在五福撰墓誌



